



Uunga:

Inatsisartunut ilaasortaq, Hans Enoksen, Partii Naleraq

**§ 37 naapertorlugu apeqqummut nr. 161-imut 22 september 2020-meersumut akissut**

Inatsisartut suleriaasianni § 37, imm. 1 naapertorlugu apeqquteqaat Inatsisartuni ilaasortamit Hans Enoksenimit Partii Naleqqameersumit apeqqutigineqartoq Naalakkersuisunit ullormi 22 september 2020-mi tiguneqarpoq.

Akissutit apeqqutigineqartut kingornatungaanniipput.

1. Ukioq manna nipsisanniarnermi Naalakkersuisut pisasseeqqinneranni Naalakkersuisut siulittaasuata suliamut attuumassuteqarpallaaraluarluni suliami aalajangeeqataasimanini Danmarkimi kammeradvokatimut nalilersortissimavaa, imatut paasineqassava, kammeradvokatip misissuisinneqarnissaa pillugu aalajangiineq Naalakkersuisut tamarmiusut aalajagigarigaat?

**Akissut:**

**Naalakkersuisut Siulittaasuut suliamut attuumassuteqarpallaartut unnerluutigineqarsimavoq. Taamatut unnerluutiginnittut ilaatigut tassaapput Inatsisartuni ilaasortat arlallit. Taamatut unnerluussineq tunngavissaqarnersoq misissorsinnaajumallugu Naalakkersuisut Siulittaasoqarfiata Eqqartuussissuserisut suliffeqarfiat Poul Schmith (Naalagaaffiup Eqqartuussissuserisuat) arlaannaanulluunniit attuumassuteqanngitsumik misissueqqusimavaa.**

**Misissuinermi inerniliunneqarpoq Naalakkersuisut Siulittaasuut suliamut attuumassuteqarsimangitsaq.**

2. Kammeradvokatip nalilersuisitaanera soorunami naleqarpoq, qanoq akeqarpa?
  - a. Tamanna suliaq kiap akilissavaa?

**Akissut:**

**Misissuititsineq 181798 kr.-inik akeqarsimavoq. Misissuititsineq Naalakkersuisut Siulittaasuanut tunngassuteqarmat tassunga aningaasartuutit Naalakkersuisut Siulittaasuata Naalakkersuisoqarfianit aningaasartuutigineqarput.**

3. Sooruna kukkunersuinermit ataatsimiititaliap suliamik qulaajaanerani paasissutissat ataatsimiititaliamit pisariaqartinneqartut Naalakkersuisunit tunniukkumaneqanngillat?

30-09-2020  
Suliap nr 2020 - 17197  
All. nr. 14972599

Postboks 1015  
3900 Nuuk  
Oqarasuaat (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

1

**Akissut:**

**Kukkunersiunermit Ataatsimiititaliap paasissutissat piumasai tamarmik Kukkunersiunermit Ataatsimiititaliamut tunniunneqarsimapput. Naalackersuisut isummernissaanut tunngavissiaq aammalu Eqqartuussissuserisut suliffeqarfiata Poul Schmith-ip (Naalagaaffiup Eqqartuussissuserisuata) misissuisimanera tamarmiusoq Kukkunersiunermit Ataatsimiititaliamut nassiunneqarsimapput. Misissuineq tamarmiusoq tamanut saqqummiunneqarnikuuvortaaq.**

**Paasissutissat suliamut attuumassuteqartut tamarmik misissuinermit erseqqissumik takuneqarsinnaapput. Tamatuma saniatigut Naalackersuisut Siulittaasuata Kukkunersiunermit Ataatsimiititaliap apeqqutaanut tamanut akissuteqarsimavoq.**

**Naalackersuisut Siulittaasuata nassuiaataa ilanngullugu nassiunneqartoq takuutaaq.**

Med venlig hilsen  
Inussiarnersumik inuulluaqqusillunga



Kim Kielsen

# **Nipisanut pisassiissutit ilaneqarnerannut tunngatillugu suliap ingerlasimaneranut nassuiaat**

## **1. Aallaqqaasiut**

Naalackersuisut Siulittaasuata/Naalackersuisup Siulittaasuata Naalackersuisoqarfia atortussat tamaasa tunniutissallugit pisussaaffigisat soorunami tunniunneqartussaasut aallaqqaataaniilli Nunatta Karsiata Naatsorsuutaasa Kukkunersiornissaannut Ataatsimiititaliamut (Kukkunersiui nermut Ataatsimiititaliaq) ilisimatitsissutigisimavaat. Atortussat taakku allallu Kukkunersiui nermut Ataatsimiititaliamit tiguneqarsimapput. (Qulaajaaneq tullinnguuttuniittoq takuuk)

Tamatuma saniatigut Naalackersuisut Siulittaasuata apeqqtigineqartunut tamanut Kukkunersiui nermut Ataatsimiititaliamit apeqqtigineqartunut akissuteqarsimavoq.

Taamaattoq Kukkunersiui nermut Ataatsimiititaliap nalunaarutaa suli tamanut saqqummiunneqanngitsoq Naalackersuisut tusarniutigisimannngilaat. Inatsisilerinerup tungaatigut isigalugu Kukkunersiui nermut Ataatsimiititaliaq tamatumunnga pisussaaffeqarsimannngilaq, tassami peqataasunut tusarniaasarneq taamaallaat Naalackersuisunut (ingerlatsivik) atuuppoq, Inatsisartunullu atuunnani. Siulittaasulli taamatut periarfissinnissaa ileqqorissaarnerussaaq. Pingaartumik Kukkunersiui nermut Ataatsimiititaliap (namminneq malittarisassatik malillugit) sakkortunerpaamik isornartorsiuinissaaq toqqarsimappagu.

## **2. Eqikkaaneq**

Kukkunersiui nermut Ataatsimiititaliap paasisutissat allagaatillu tamaasa tigunissaannut piumasaaqatigisatik tigusimassagai Naalackersuisut Siulittaasuata/Naalackersuisut Siulittaasuata Naalackersuisoqarfik naliliivoq. Taamaattoq ilumut Kukkunersiui nermut Ataatsimiititaliaq oqartussaaffittut suliamik taassuminnga misissuisuussanersoq nalorninartoqarpoq.

Paasisutissanik allagaatinillu suliamik takunnittussaataitanermit ilaannngitsunik tunniussaqaartannginnissamat ileqqusoq ukiuni kingulliunerusuni atorpeqarsimavoq. Pingaartumik Naalackersuisut isummernissaannut tunngavissiat pineqarsimatillugit.

Suleqatigiissitamik suligasuartussamik Naalackersuisut Siulittaasuata Naalackersuisoqarfiani Inatsisilerinermit Immikkoortoqarfimmi atorfilittanik aamma Inatsisut Allattoqarfiani inatsisilerituunik inuttaqartumik pilersitsisoqassasoq Naalackersuisut Siulittaasuata Inatsisartut Siulittaasoqarfianut akissuteqarnermini siunnersuuteqarpoq, taakkulu Naalackersuisut paasisutissanik allagaatinillu Inatsisartunut tunniussaqaarnissamik pisussaaffilerneqarsimatillugit inatsisinut atuuttunut nassuiaammik suliaqartinneqassapput.

## **3. Atortussat Kukkunersiui nermut Ataatsimiititaliamit tiguneqartut**

- Nipisanut pisassiissutit qaffanneqarnerat pillugu Naalakkersuisut isummernissaannut tunngavissiaq
- Kammeradvokatimit misissuineq tamarmiusoq (misissuineq tamakkerlugu aamma tamanut saqqummiunneqarsimavoq)
- Tamatuma saniatigut Naalakkersuisut Kukkunersiuinermut Ataatsimiititaliap apeqqutaanut tamanut akissuteqarsimapput.

*Naalakkersuisut isummernissaannut tunngavissiaq pillugu*

Naalakkersuisut isummernissaannut tunngavissiaq suliamik takunnissinnaatitaanermut ilaanngilaq, takuuk pisortat ingerlatsinerat pillugu paasitinneqarsinnaatitaaneq pillugu inatsimmi § 10, nr. 1. Taamaattoq Naalakkersuisut Siulittaasuata Naalakkersuisoqarfiata nammineerluni isummernissamut tunngavissiaq Kukkunersiuinermut Ataatsimiititaliamut tunniutissallugu toqqarsimavaa. Isummernissamut tunngavissiap tunniunnerani Naalakkersuisut Siulittaasuata Naalakkersuisoqarfianit erseqqissarneqarpoq isummernissamut tunngavissiap tunniunneqarnissaanut Kukkunersiuinermut Ataatsimiititaliaq piumasaqarsinnaanngitsoq, tamannalu pissutigalugu isummernissamut tunngavissiaq "isertugassatut" naqissuserneqarsimavoq, Kukkunersiuinermullu Ataatsimiititaliap ilaasortaanuinnaq tunniunneqartussaalluni.

**4. Atortussat Kukkunersiuinermut Ataatsimiititaliamit tiguneqartut**

- Suliffeqarfiup iluani sulinermut allagaatit. (Suliamut takunnissinnaatitaanermut ilaanngilaq, takuuk pisortat ingerlatsinerat pillugu paasitinneqarsinnaatitaaneq pillugu inatsimmi § 7.)
- Kammeradvokatimik allaqateqartarnek. (Suliamut takunnissinnaatitaanermut ilaanngilaq, takuuk pisortat ingerlatsinerat pillugu paasitinneqarsinnaatitaaneq pillugu inatsimmi § 10, nr. 4.)

*Kammeradvokatimik allaqateqartarnek pillugu*

Kammeradvokatip misissuinerani paasissutissat allagaatillu suut Naalakkersuisup Siulittaasuata Naalakkersuisoqarfianeersut Kammeradvokatimit tiguneqarsimanersut, suullu Kammeradvokatimit tiguneqarsimannginnersut, ersarissumik takuneqarsinnaapput. Tamanna aamma Naalakkersuisut Kukkunersiuinermut Ataatsimiititaliamut akissutigisimavaat.

**5. Inatsisartut qanoq ilillutik Naalakkersuisunut pisussaaffiliisinnaappat (inatsisitigut)?**

Kalaallit Nunaanni pissaaneq pingasunut avinneqarnikuuvoq, takuuk Namminersorneq pillugu Inatsimmi § 1. Tamanna isumaqarpoq inatsisilerinerup iluani Inatsisartut qullersaasut, naalakkersuinerup iluani Naalakkersuisut qullersaasut eqqartuussisarnerullu iluani eqqartuussiviit qullersaasut.

Tamanna aamma isumaqarpoq Inatsisartut Naalakkersuisut tungaannut pisussaaffilerneqassappata imaluunniit eqqartuussiviit tungaannut (tiguneqartunut) pisussaaffilerneqassappata, pisussaaffiliinerit tamakku Inatsisartut Inatsisaanni aalajangersaaffigineqassasut. Pisussaaffiliinerit tamakku Inatsisartut kisimiillutik suleriaasertillu malillugu aalajangersaaffigisinnaanngilaat. Tamannalu Naalakkersuisut siusinnerusukkut Inatsisartunut uparuareernikuuaat.

2019-imi upernaakkut ataatsimiinnermi immikkoortoq 26 aqutigalugu Inatsisartut Suleriaasiannut allannguutissanik arlalinnik Inatsisartut Siulittaasoqarfiat siunnersuuteqarpoq. Apeqqutit Inatsisartuneersunut Naalakkersuisut akissuteqarnissaannut pisussaaffiliinerit annertusarnissaat allannguutissat ilaanni siunertarineqarsimavoq. Apeqqutit tamakku Inatsisartut Naalakkersuisullu pillugit Inatsisartut inatsisaanni § 12-imi inatsisitigut tunngaviligaapput, kingornagullu Inatsisartut Suleriaasianni § 37-mi uteqqinneqarlutik.

Naalakkersuisut Siulittaasuata Naalakkersuisoqarfiata tusarniaanermut akissuteqarnermini erseqqissarpaa Inatsisartut kisimiillutik Naalakkersuisut pisussaaffilernissaannik peqqusisinnaanngitsut isumaqarfigineqartoq. Inatsisartut Naalakkersuisut pisussaaffilernissaannik peqqusiniarpata tamanna Inatsisartut inatsisaatigut pissaaq. Inatsisartut Siulittaasoqarfiat tamatumunnga isumaqataassasoq ilimagisariaqarpoq, tassami oqaaseqaat tamanna tusaatissat tigussallugu toqqarsimammassuk, kinguneratigullu 2020-mi upernaakkut ataatsimiinnermi immikkoortoq 168 aqutigalugu Inatsisartut Naalakkersuisullu pillugit Inatsisartut inatsisaannut allannguutissatut siunnersuut saqqummiullugu. Tamatuma kingorna pisussaaffiliisarneq inatsisitigut aalajangersaaffigineqarpoq.

## **6. Kukkuersiunermit Ataatsimiititaliap suliassai**

Inatsisartuni pingasunik ataatsimiititaliaqarpoq Naalakkersuisunut immikkut pisinnaatitaaffilernerqarsimasunik. Pisinnaatitaaffiit tamakku Inatsisartut Naalakkersuisullu pillugit Inatsisartut inatsisaanni aalajangersarneqarput.

Ataatsimiititaliat taakku tassaapput:

- 1) Aningaasaqarnermut Ataatsimiititaliaq. (§§ 16 aamma 17)
- 2) Nunatta Karsiata Naatsorsuutaasa Kukkuersiornissaannut Ataatsimiititaliaq (Kukkuersiunermit Ataatsimiititaliaq) (§§ 18 aamma 19)
- 3) Nunanut Allanut Sillimaniarnermullu Ataatsimiititaliaq (§ 21)

Kukkuersiunermit Ataatsimiititaliamut immikkut pisinnaatitaaffiit Inatsisartut inatsisaanni §§ 18 aamma 19-imi allasimapput. Suliassi tassani aalajangersagaq attuumassuteqartoq tassaavoq § 18:

"§ 18. Nunap karsiata Naatsorsuutaasa Kukkuersiorneqartarnerannut Ataatsimiititaliap nunap karsiata naatsorsuutai kukkuersiuisullu taakkununga oqaaseqaataat ukiumut ataasiarluni misissortassavai, naatsorsuutillu pisariaqalersitaannik Naalakkersuisunut apeqquteqarlunilu oqaaseqarfiginnittassalluni. Apeqqutit oqaaseqaatillu akissutillu Naalakkersuisuneersut Inatsisartunut saqqummiunneqassapput.

*Imm. 2.* Ataatsimiititaliap nalilersorinnaavaa suliffeqarfiit imm. 1 malillugu kukkuersiunermit ilaasut aningaasaataasa aqunneqarneranni suliffeqarfiillu ingerlanneqarneranni aningaasanut tunngasut naapertuuttumik isiginiarneqarsimansut. Nassuiaatit, nalunaarutit il.il. nalilersuinnermi atugassatut suliarineqarsimasut tiguneqarnerisa kinguninngua ilisimatitsissutitut Naalakkersuisunut nassiunneqassapput.

*Imm. 3.* Ataatsimiititaliap suliaminut atugassatut atortussat pisariaqartut, naatsorsuutitunut upernarsaatit, nalunaarusiat il.il. oqartussamit naatsorsuuserisumit piniarsinnaavai. Ataatsimiititaliamut ilaasortat arlaata kissaatigippagu paasissutissat taaneqartut ataatsimiititaliamit piniarneqassapput."

---

Soorlu § 18, imm. 1-imi atuarneqarsinnaasoq Kukkunersiuinermut Ataatsimiititaliamut immikkut pisinnaatitsissutit nunatta karsiata naatsorsuutaasa, tassungalu kukkunersiuusup oqaaseqaataasa, misissuiffiginissaannut tunngapput. Atortussallu Kukkunersiuinermut Ataatsimiititaliamit § 18, imm. 3 malillugu pissarsiarineqarsinnaasut tassaapput § 18, imm. 1 malillugu sulinissamut atatillugu attuumassuteqarsinnaasut. Immikkut pisinnaatitsissutit § 18 malillugu taamaallaat taakkununga atorneqarsinnaapput.

## **7. Suliat allat Kukkunersiuinermut Ataatsimiititaliap sularisimasai**

Kukkunersiuinermut Ataatsimiititaliap siusinnerusukkut misissuinernik/nalunaarutininik suliartarsimavoq. Naalakkersuisulli Siulittaasuata Naalakkersuisoqarfia isumaqarpoq suliart tamakku suliart matumunnga attuumassuteqanngitsut.

*Aleqa Hammondip misissuiffigineqarnera ([link](#))*

Tassani Kukkunersiuinermut Ataatsimiititaliap kukkunersiuusumut misissuisitsinissamik inniminniisimavoq. Suliaq Nunatta Karsiata aningaasaataanik atuisimanermut tunngassuteqarpoq. Nunatta Karsiata aningaasaataanik atuisimanermut nakkutiginninneq Kukkunersiuinermut Ataatsimiititaliap suliassaannut soorunami ilaavoq.

*Doris J. Jacobsenip misissuiffigineqarnera ([link](#))*

Suliami benzinamut allagartamik atuisimaneq pineqarpoq. Benzinamut allagartamut aningaasartuutit nunatta karsianit akilerneqarsimapput. Tamannalu pissutigalugu suliaq taanna Kukkunersiuinermut Ataatsimiititaliap suliassaanut erseqqissumik ilaasimavoq. Taamaattoqaraluartoq misissuititsinissamut Doris Kukkunersiuinermut Ataatsimiititaliamut inniminniinani nammineerluni inniminniisimavoq.

*Avaleraasartuut pillugit misissuititsineq 2015-imeersoq*

Suliami tassani Aalisarnermut, Piniarnermut Nunalerinermullu Naalakkersuisoqarfik misissuititsinissamut Kukkunersiuinermut Ataatsimiititaliamut inniminniinani nammineerluni inniminniisimavoq.

*Nipisanniarnermut pisassiissutit qaffannissaat pillugit suliaq (suliaq matumani pineqartoq)*

Siulittaasoq nipisanniarnermut pisassiissutit qaffanneqarnissaat pillugu aalajangiisoqarnerani Siulittaasoq attuumassuteqarsimanersoq attuumassuteqarsimannginnersorluunniit suliami matumani pineqarpoq. Nipisanniarnissamut pisassiissutit qaffannissaat pillugu Naalakkersuisut aalajangiinerat immini nunatta karsiata naatsorsuutaanut sunniuteqanngillat - aalajangiineq immini nunatta karsiata aningaasartuuteqalernissaanut isertitaqalernissaanulluunniit pisussaaffiliinngilaq - allatullu pisoqaraluarpuunniit nunatta karsiata naatsorsuutaani takuneqarsinnaasussaanatik. Taamaammallu suliaq matuma Kukkunersiuinermut Ataatsimiititaliap suliassaanut ilaanersoq takujuminaappoq.

Aalajangiineq ilumut attuumassuteqanngissinnaanermut tunngatillugu unioqqutitsinerunnginnersoq suliami matumani pineqarpoq. Inatsisartunilu ilaasortat ilaasa suliaq misissoqqusimappassuk ataatsimiititaliaanngitsup, Inatsisartulli Ombudsmandiata suliaq misissussappagu

pissusissamisoornerpaassagalarpoq. Inatsisartullu Ombudsmandiat aamma paasissutissat allagaatillu tamakkerlugit Naalakkersuisunut tunniunneqarnissaannik piumasqaassalluni inatsisitigut tunngavissaqarpoq.

## **8. Inatsisinik attuumassutilinnik itisiliineq**

Naalakkersuisut Siulittaasuata/Naalakkersuisut Siulittaasuata Naalakkersuisoqarfiata aallaqqaataaniilli Kukkunersuiunermut Ataatsimiititaliamut ilisimatitsissutigisimavaa atortussat Kukkunersuiunermut Ataatsimiititaliap atorfissaqartitai tamarmik soorunami tunniunneqarumaartut. Tamatuma kingorna Naalakkersuisup Siulittaasuata Naalakkersuisoqarfiata Kukkunersuiunermut Ataatsimiititaliamut itisileqqusimavaa atortussanut pisortat ingerlatsineranni paasitinneqarsinnaatitaaneq pillugu inatsit malillugu takunnissinnaatitaanermut ilaanngitsunut sutigut inatsisitigut tunngavissaqarnersut paaserusullugu.

Kukkunersuiunermut Ataatsimiititaliaq Kommunit Namminersorlutillu Oqartussat missingersuutaat pillugit Inatsisartut inatsisaanni nr. 26, 28. november 2016-imeersumi §§ 39 aamma 40-mut aamma Inatsisartut Naalakkersuisullu pillugit Inatsisartut inatsisaanni nr. 26, 18. november 2010-meersumi §§ 18 aamma 19-imut innersuussuteqarpoq.

Tamatuma saniatigut Inatsisartut Siulittaasoqarfiat Inatsisartut Suleriaasianni § 14, imm. 2 aamma 3-mut innersuussuteqarsimavoq.

Aalajangersakkat tamakku suliamut matumunnga suna pillugu attuumassuteqannginersut Naalakkersuisut Siulittaasuata Naalakkersuisoqarfia qanoq isumaqarnersoq tullinnguuttuni nassuiaaffigineqarpoq.

### ***Inatsisartut Suleriaasiat***

Inatsisartut Suleriaasiat inatsisaanngilaq. Inatsisinngortinneqassappallu tassunga siunnersuutip Inatsisartuni pingasoriarlugu oqaluuseriarlugu akuersissutigineqarnissaa, siunnersuutillu tamatuma kingorna Naalakkersuisut Siulittaasuannit atortussanngortinnissaa, tamatumalu kingorna Inatsisartut inatsisaata atortussanngortinneqartup tamanut saqqummiunneqarnissaa pisariaqarpoq. (Inatsisartut Naalakkersuisullu pillugit Inatsisartut inatsisaanni kapitali 7 takuuk).

Inatsisartut Suleriaasianni Inatsisartunut *inatsisartut iluanni* ileqqorissaarnissamut malittarisassat, oqaluuserinninnissamut malittarisassat, ataatsimiititalianut malittarisassat il.il. aalajangersarneqarput. Inatsisartulli suleriaatsiminni Naalakkersuisunut (inatsisitigut) pisussaaffiliisinnaanngillat. Inatsisartut Naalakkersuisunut pisussaaffiliinissamik kissaateqassappata tamanna Inatsisartut inatsisaatigut pissaaq.

Inatsisartut Suleriaasiannut inatsisitigut tunngaviliinissaq (Inatsisartut inatsisaat):

"§ 5. Inatsisartut innimiginarluinnartussaapput.

*Imm. 2.* Inatsisartunut ilaasortat sulinerminni namminneq nalunneqatiginnissusertik kisiat tunngavigissavaat.

*Imm. 3.* Inatsisartut suleriaasertik nammineerlutik aalajangersassavaat."

---

Inatsisartut Siulittaasoqarfiata § 14, imm. 2 aamma 3 inatsisitigut tunngavigisatut innersuussutigivai:

”§ 14. Ataatsimiititaliap suliassaasa pingaarnersaraat siunnersuutit Inatsisartunit ataatsimiititaliamut innersuussat suliarineqartarnissaat.

*Imm. 2.* Ataatsimiititaliaq, ilaatigut Naalakkersuisunut apeqquteqartarnermigut, suliassa qarfirmi iluani ingerlatsineramik malittarinninnissaminut pisussaavoq aammalu Naalakkersuisut inatsisitigut killissarititat iluanni ingerlatsinikkulluunniit ileqqorissaarnermut tunngatillugu killigititat iluanni ingerlatsinissaat nakkutigissallugu.

*Imm. 3.* Ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalakkersuisunit naammassineqassaaq. Naalakkersuisut taamaallaat paasissutissanik ataatsimiititaliap pissarsisinaanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortuneroqisunut tunulliuunneqartariaqarpat. Taamatut killiliineq tamatigut allakkatigut tunngavilersorneqarsimassaaq.”

---

Inatsisartut suleriaatsiminni illuinnarsiorlutik Naalakkersuisunut pisussaaffiliisinnaanngillat. Inatsisartut aatsaat Inatsisartut Inatsisaatigut taamaaliorsinnaapput. Aamma Naalakkersuisuni ileqquuvoq - pingaartumik ukiuni kingulliunerusuni - assersuutigalugu Naalakkersuisut isummernissaannut tunngavissianik Inatsisartuni ataatsimiititalianut tunniussa qarneq ajorneq, tamatumunngalu pissutaavoq tamakku suliamut takunnissinnaatitaanermut pisinnaatitaaffimmut ilaanginnerat, pisortat ingerlatsineranni sulianik takunnissinnaatitaaneq pillugu inatsimmi § 10, nr. 1 takuuk. Aamma pisortat ingerlatsineranni sulianik takunnissinnaatitaaneq pillugu inatsimmi § 10, nr. 1 innersuussutigalugu nipisanni arnermut pisassiissutit qaffannissaat pillugit isummernissamut tunngavissiaq Aalisarnermut, Piniarnermut Nunalerinermullu Naalakkersuisoqarfiup tunniukkusussimangilaa.

2014-imilu Savalimmiuni Lagtinget Savalimmiuni Lagtingip misissuiffigineqarnissaanik aallartitsisimapput. Taamanikkut misissuititsinermit aqutsisuvoq Folketingimi Ombudsmandi Hans Gammeltoft-Hansen. Misissuititsinermit ”Eysturoyartunnilin pillugu suliap aqunna” pineqarpoq. Naalakkersuisunut ilaasortap allagaatinik suliffeqarfiup iluani ator neqartunik Lagtingimut tunniussissalluni pisussaaffeqarner soq pillugu misissuinermit apeqqutinut ilaavoq.

Tassani Hans Gammeltoft-Hansenip paasisaa tassaavoq:

*”Lagmandip savalimmiunilu naalakkersuisut Lagtingimut paasissutissiinissamik pisussaaffeqarnerat malittarisassat nalinginnaasut amerlanertigut ministerit Folketingimut paasissutissiinissamik pisussaaffeqarnerat pillugit malittarisassanut atuuttunut assingupput, allanillu immikkut ittunik isumaqartoqarsimangippat taamatut paasisariaqarlutik. Naalakkersuisut paasissutissiinissamik pisussaaffeqarnerannut tunngatillugu inatsisitigut tunngavigineqartut siullertut tassaapput aqutsineq pillugu inatsit aamma naalakkersuisut akisussaassuseqarnerat pillugu inatsit. Tunngaviusumik inatsit assigalugu aqutsineq pillugu inatsimmi Lagmandip naalakkersuisunilu ilaasortat Lagtingimut paasissutissanik*



*nalunaaruteqartarnissaannut nalinginnaasumik pisussaaffilernissaannut malittarisassanik nalinginnaasunik aalajangersaasoqarnikuunnigilaq (imaluunniit ilisimaneqartut malillugit savalimmiormiut inatsisaanni allani). Tassani pineqarput nammineerluni paasissutissanik nalunaaruteqarsinnaanermut pisussaaffik aamma Lagtingip ilaasortaasa imaluunniit ataatsimiititaliat apeqqutaannut akissuteqarnissamut pisussaaffik, taamaalillunilu paasissutissanut apeqqummi pineqartunut nalunaaruteqarsinnaaneq aamma..*

*Kingullertut taaneqartumut tunngatillugu, tassa apeqqutigineqartunut nalinginnaasumik pisussaaffeqarluni akissuteqarsinnaanermut pisussaaffeqannginnermut tunngasortaa, aqutsineq pillugu inatsimmi § 21 aqutigalugu mininneqarpoq. Aalajangersagaq taanna malillugu lagtingimi ilaasorta qinaluunniit Lagtingip akuersineratigut (imaluunniit § 21, imm. 2 malillugu lagtingimi ilaasortat najuuttut tallimararterutaasa akuersinerisigut) pisortani suliasaq suugaluartoq isumaqatiginninniutigisussanngortinniarlugu saqqummiussisinnaavoq, tamannalu pillugu Lagmandip imaluunniit naalackersuisunut ilaasortap nassuiaataa suliasanngortissinnaallugu. § 21, imm. 1-imi aalajangersagaq tunngaviumsumik inatsimmi § 53-imut assinguvoq.*

*Lagtingip suleriaasiat lagtingimi ilaasortat allakkatigut oqaatsitigullu apeqqutaat pillugit §§ 52 aamma 53-imik imaqarpoq. § 53, stk. 1-4 aqutsineq pillugu inatsimmi § 21 naapertorlugu apeqqutinut tunngavoq. Suleriaatsimi aalajangersakkat allat apeqqutigineqartunut Lagmandip imaluunniit naalackersuisunut ilaasortat akissuteqarnissaannut pisussaaffimmik tunngaviliinngillat. Lagtinget Lagtingip suleriaasianni tunngaveqarlutik kisimiilluni apeqqutigineqartunut Lagmandimut imaluunniit naalackersuisunut ilaasortamut allamut akissuteqaqqusillutik peqqusisinnaanngilaq."*

---

Hans Gammeltoft-Hansenip paasinninnera malillugu atortussanik suliamik takunnissinnaatitaanermut ilaanngitsunik Inatsisartut Naalackersuisut tunniusseqqullugit pisussaaffilissallugit inatsisitigut tunngaveqarnissaq piumasarineqarpoq.

### ***Inatsisartut Naalackersuisullu pillugit Inatsisartut inatsisaat***

Nunatta Karsiata Naatsorsuutaanut Kukkunersiuinermut Ataatsimiititaliap (Kukkunersiuinermut Ataatsimiititaliaq) Naalackersuisunut tunngatillugu immikkut pisussaaffeqarnerat:

**"§ 18.** Nunap karsiata Naatsorsuutaasa Kukkunersiorneqartarnerannut Ataatsimiititaliap nunap karsiata naatsorsuutai kukkunersiuisullu taakkununga oqaaseqaataat ukiumut ataasarluni misissortassavai, naatsorsuutillu pisariaqalersitaannik Naalackersuisunut apeqquteqarlunilu oqaaseqarfiginnittassalluni. Apeqqutit oqaaseqaatillu akissutillu Naalackersuisuneersut Inatsisartunut saqqummiunneqassapput.

*Imm. 2.* Ataatsimiititaliap nalilersorinnaavaa suliffeqarfiit imm. 1 malillugu kukkunersiuinermut ilaasut aningaasaataasa aqunneqarneranni suliffeqarfiillu ingerlanneqarneranni aningaasanut tunngasut naapertuuttumik isiginiarneqarsimanersut. Nassuiaatit, nalunaarutit il.il. nalilersuinermit atugassatut suliarineqarsimasut tiguneqarnerisa kinguninngua ilisimatitsissutitut Naalackersuisunut nassiunneqassapput.

*Imm. 3.* Ataatsimiititaliap suliaminut atugassatut atortussat pisariaqartut, naatsorsuutinut uppersaatit, nalunaarusiat il.il. oqartussamit naatsorsuuserisumit piniarsinnaavai.

Ataatsimiititaliamut ilaasortat arlaata kissaatigippagu paasissutissat taaneqartut ataatsimiititaliamit piniarneqassapput."

Soorlu aalajangersakkami takuneqarsinnaasoq Kukkunersiuinermut Ataatsimiititaliap Naalackersuisunut immikkut pisussaaffigisaani nunatta karsiata, tassungalu kukkunersiuisartut oqaaseqaataasa, misissuiffiginissaat pineqarput. Tamanna pisussaaffiuvoq nalinginnaasoq Kukkunersiuinermut Ataatsimiititaliap § 18-imi takuneqarsinnaasut saniatigut sulianut allanut atussallugu toqqarsinnaasaa.

---

Tamatumalu saniatigut taaneqassaaq Inatsisartut nipisanniarnissamut pisassiisutit qaffanneqarnerisa arlaannaanulluunniit attuumassuteqanngitsumik misissuiffiginissaannut kissaateqarsimappata Inatsisartut tamatumunnga § 20-mi inatsisitigut tunngavissaqarput:

"§ 20. Inatsisartut Ombudsmandimik qinersisassapput Inatsisartut sinnerlugit Namminersorlutik Oqartussat kommunillu ingerlatsinerannik malinnaasussamik. Ombudsmandi inatsisartunut ilaasortaasinnaanngilaq inatsisilerituutullu ilinniarsimasuussalluni.

*Imm. 2.* Ombudsmandi Inatsisartunit tatigineqarunnaarpat Inatsisartut soraarsissinnaavaat.

*Imm. 3.* Ombudsmandip sulinera Inatsisartut Inatsisit Atortinneqarnerannut Ataatsimiititaliaata ingerlaavartumik malinnaavigissavaa. Ombudsmandi ingerlatani pillugit ukiumoortumik nalunaarummik Inatsisartunut saqqummiussisassaaq.

*Imm. 4.* Ombudsmandip pissutsit atugarisai erseqqinnerusut immikkut Inatsisartut inatsisaatigut aalajangersarneqassapput.

Inatsisartut Ombudsmandiat tamatuma saniatigut paasissutissanik allagaatinillu Ombudsmandip piumasarisaaq tunniussisoqarnissaaq piunnaqarsinnaavoq, takuuk Inatsisartut Ombudsmandiat pillugu Inatsit:

"§ 18. Oqartussaasut il.il. Ombudsmandip sulinerani pineqartunut ilaatinneqartut paasissutissanik allagaatinillu il.il. Ombudsmandip tunniuteqqusaanik Ombudsmandimut nalunaaruteqarnissaminnut tunniussinissaminnullu pisussaaffeqarput.

*Imm. 2.* Ombudsmandip oqartussaasut il.il. sulinermini pineqartunut ilaatinneqartut allakkatigut oqaaseqaateqaqqullugit piunnaqarfigisinnavaa.

*Imm. 3.* Ombudsmandi inunnik misissuinermini pissutsit pingaaruteqartut pillugit eqqartuussivimmi nassuiaateqartussanik aggeqqusisinnavaoq. Nassuiaatit eqqartuussivimmi killisiuisarneq pillugu malittarisassat malillugit saqqummiunneqassapput.

*Imm. 4.* Ombudsmandip atorfeqarfiit imaluunniit suliffeqarfiit atorfeqarfiusulluunniit allat suugaluartut oqartussaasut § 7-imi taaneqartut il.il. suliassaannik ingerlatsiffiusut ornillugit misissuiffiginnaavai, ininullu tamanut isersinnaatitaalluni.

*Imm. 5.* Ombudsmandi tamanna pisariaqartoq naliliisoqarpat sukkulluunniit kinaassutsip ilisarnaataanik pisariaqarneratut annertutigisumik takutitsilluni eqqartuussivillu aalajangiitinnikkaluarlugu paaqqinniffinnik/suliffeqarfinnik il.il. inuit kiffaanngissusiagaaffigisimasaannik kiffaanngissusiagaaffigisinnasaannilluunniit, tak. § 7, imm. 1-imi oqaaseqatigiit aappaat, aamma paaqqinniffinnik/suliffeqarfinnik namminersortunik il.il. meeqqat eqqarsaatigalugit suliassanik imaaliillaannaq isumaginnittunik, tak. § 7, imm. 1-imi oqaaseqatigiit pingajui, misissuiartorluni isersinnaavoq.

***Kommunit Namminersorlutillu Oqartussat missingersuutaat naatsorsuutaallu pillugit Inatsisartut Inatsisaat***

Inatsit taanna Kukkunersiuinermut Ataatsimiititaliamut arlaatigut pisussaaffiliinngilaq, kisiannili "...kukkunersiuisartoq naalagaaffimmit akuerisaasoq Inatsisartunit toqqagaq" pisussaaffeqartitaalluni. Pisussaaffiilu taakku nunatta karsiata naatsorsuutaasa kukkunersiorneqarnissaannut tunngatillugu "taamaallaat" atuutsinneqarput. Tassalu Kukkunersiuisoq atortussanik piumalluni piumasaqarnissamut nalinginnaasumik pisussaaffilerneqanngilaq. Kukkunersiuisoq inatsimmi § 39 malillugu atortussanik Kukkunersuiisup suliassaanut attuumassutilinnik piumalluni taamaallaat piumasaqarsinnaavoq. (Tamanna Inatsisartut Ombudsmandianut allaaneruvoq).

Inatsimmi ilaatigut aalajangersarneqarpoq:

"§ 35. Naalackersuisut ukiumut aningaasanut inatsiseqarfiusumut kingullermut tunngatillugu Nunatta Karsiata naatsorsuutai kukkunersuisut allattugaat ilanngullugit kingusinnerpaamik Inatsisartut ukiakkut ataatsimiinneranni saqqummiuttassavaat.

*Imm. 2.* Nunatta Karsiat naatsorsuutaasa sananeqarnermikkut ukioq aningaasanut inatsiseqarfiusoq aamma ilassutitut aningaasanut inatsiseqarfiusoq malissavaat, imarissavaalu ukiumi aningaasanut inatsiseqarfiusumi kingullermi Nunatta Karsiata isertitai aningaasartuutaalu tamarmiusut kiisalu Nunatta Karsiata pigisai nalillit akiligassaalu aamma ukiup ingerlanerani atuisimanerit.

[...]

§ 38. Nunatta Karsiata ukiumoortumik naatsorsuutaanik kukkunersuisarneq kukkunersuisunit naalagaaffimmit akuerisaasunit Inatsisartut toqqagaannit isumagineqartassaaq.

§ 39. Nunatta Karsiata naatsorsuutai pisortat kukkunersiuinermi ileqqorissaarnissaat naapertorlugu kukkunersuisut kukkunersiortassavaat aamma Nunatta Karsiata naatsorsuinermi atortui isornartorsiuisumik misissortassavaat. Kukkunersuisut ilaatigut naatsorsuutit eqqortuunersut misissortassavaat, aamma pissutsit naatsorsuutunik saqqummiussinermi pineqartut aningaasaliissutitut, inatsisinut najoqqutassanullu allanut kiisalu isumaqatigiissutigisanut aamma suleriaatsinut nalinginnaasunut naapertuunnersut misissortassavaat.

*Imm. 2.* Kukkunersiuisoq Inatsisartut kukkunersiuinermut tunngatillugu piumasaqaataanik malinnissaaq, piumasaqaatit inatsimmut aamma pisortat kukkunersiuinermi ileqqorissaarnissaannut akerliunngippata.

§ 40. Naalackersuisut paasissutissanik suugaluartunik naatsorsuutit naliliiffiginissaannut pisariaqartinneqartunik kukkunersuisunut nalunaaruteqassapput, takuuk Inatsisartut Naalackersuisullu pillugit Inatsisartut inatsisaanni § 18 aamma § 19."

**9. Inatsisartuni ataatsimiititaliat paasissutissanik Naalackersuisunit piumasinnaanerat pillugu Inatsisartut Siulittaasoqarfiannit saaffiginissutit**

Allakkatigut 5. august 2020-meersutigut Inatsisartut Siulittaasoqarfiat Naalakkersuisut Siulittaasuannut saaffiginnippoq. Sammisaq tassaavoq: "Inatsisartuni ataatsimiititaliat paasissutissanik Naalakkersuisuneersunik pisinnaanerat"

Inatsisartut Siulittaasoqarfiata ilaatigut nipisanniarnissamut pisassiissutit qaffanneqarnissaannut tunngatillugu Naalakkersuisut isummernissaannut tunngavissiap Aalisarnermut, Piniarnermut Nunalerinermullu Ataatsimiititaliamut tunniuteqqusaannginnera uparuarpaq. (Naalakkersuisoq/Aalisarnermut, Piniarnermut Nunalerinermullu Naalakkersuisoqarfik pisortat ingerlatsineranni sulianik takunnissinnaatitaaneq pillugu inatsimmi § 10, nr. 1 innersuussutigalugu isummernissamut tunngavissiamik tunniussa qarumasimangillat.

Inatsisartut Siulittaasoqarfiat isumaqarpoq Inatsisartut Suleriaasianni § 14, imm. 3-mi Naalakkersuisut ilaatigut isummernissamut tunngavissianik Naalakkersuisut ataatsimiinnissaanni tunniussinissaannut peqquneqarsinnaasut, naak tamakku suliamik takunnissinnaatitaanermut ilaangikkaluartut. Naalakkersuisut taamatut isumaqarnermut isumaqataasutut oqaatigineqarsinnaanngillat, taamaaliortoqartartuuppammi Naalakkersuisut ataatsimiinneranni isummernissamut tunngavissianik Naalakkersuisut Inatsisartunut tamatigut tunniussisartussaagaluar mata. Inatsisartut isummernissamut tunngavissianik tamakkuninnga piomasaqarsinnaanngitsutut isumaqarfigineqarmat ukiuni kingulliunerusuni tunniussisoqartarsimangilaq.

Taamaattoq Inatsisartut Siulittaasoqarfiata isumaqataaffigaat tamanna pillugu aalajangersakkat ersernerlussinnaammata - tassa sunik tunniussissalluni pisussaaffeqarneq. (Tamanna Naalakkersuisut paasissutissanik allagaatinillu tunniussissallutik namminneerlutik tamatumunnga inatsisitigut pisussaaffeqanngikkaluarlutik toqqaasinnaanerannut akerliuvoq. Naalakkersuisut taamaaliorpata allagaatit isertortuunerat Inatsisartunut erseqqissaatigissallugu nalinginnaasuvoq.)

Naalakkersuisullu ajornartorsiutinngortumut pineqartumut oqaaseqaateqassappata Siulittaasoqarfik tamakkuninnga tigusissalluni qilanaarmat, soorluttaarlu Siulittaasoqarfik soorunami tamanna pillugu oqaatsitigut oqallinnissamut ammamat Siulittaasoqarfiup naggasiutigalugu oqaatigissavaa.

#### **10. Inatsisartut Siulittaasoqarfiannut akissut Ataatsimiititaliat Naalakkersuisunit paasissutissanik pissarsitinnegarnissamik piomasaqarsinnaanerannut tunngasooq**

(Nassiunneqarfia ulloq 21. september 2020 Inatsisartut Siulittaasoqarfianut, allagaq kakkiussimasooq takuuk)

*"Naalakkersuisunit paasissutissanik uppernarsaatinilluunniit tunineqarnissamut piomasaqarsinnaaneranut tunngatillugu Inatsisartut periarfissaannik pisinnaatitaaffiinillu nalornissuteqartoqarnerata akuerineqarsinnaannginneranut Naalakkersuisut Siulittaasua isumaqataavoq.*

*Tassunga atatillugu atorfilittat nassuiaasioqqaarnissaat naleqqunnerpaassasooq Naalakkersuisut Siulittaasuat isumaqarpoq. Atorfilittanik Naalakkersuisut Siulittaasoqarfiani Inatsisartut immikkoortotaqarfianeersunik aamma inatsisilerituunik Inatsisartut Allattoqarfianeersunik inuttaliilluni sukkasuumik suliaqarsinnaasunik inuttalerlugit suleqatigiissitaliortoqarnissaa naleqquttuussaaq.*

*Siullermik malittarisassat sorliit ullumikkut atuunnersut suleqatigiissitami  
qulaajarneqarsinnaapput tamatumalu kingorna malittarisassat siunissami qanoq  
isikkoqarsinnaanerannut siunnersuuteqarsinnaallutik. Tassunga atatillugu Folketingimi  
Lagtingimilu malittarisassat atuuttut suleqatigiissitami isumassarsiorfigineqarsinnaapput.*

*Naggataatigut malittarisassat taakku inatsimmut atuuttumut qanoq atuutilersinneqarnissaannut  
tunngatillugu suleqatigiissitaq siunnersuuteqarsinnaassaaq."*



INATSIARTUT  
SIULITTAASUAT

Naalackersuisut Siulittaasuannut

Ulloq: 5 august 2020  
j.nr. 01.10.09.00029

### **Ataatsimiititaliat Naalackersuisunit paasissutissanik pissarsitinneqarnissamik piunasaqarsinnaanerit**

Naalackersuisut isummernissaannut tunngavissiap assilineranik Aalisarnermut, Piniarnermut Nunalerinermullu Ataatsimiititaliamut tunniussinissartik Naalackersuisut itigartitsissutigisimagaat Siulittaasoqarfimmit paasineqarpoq. Matumani isummernissamut tunngavissiaq nipisattassiissutit amerlineqarnissaannut tunngassuteqartoq pineqarpoq.


Siulittaasoqarfiup paasinninnera malillugu Naalackersuisut itigartitsinerminnut tunngavilersuutitut (taamaallaat) Pisortat ingerlatsinerat pillugu paasitinneqarsinnaatitaaneq pillugu Inatsisartut inatsisaanni malittarisassanut innersuussisimapput. Tamannalu Siulittaasoqarfimmit ima paasineqartariaqarpoq, tassa Naalackersuisut isumaqartut ataatsimiititaliat allakkatigut atortussanik tunineqarnissamik piunasaqaateqarsinnaanerannut Inatsisartut suleriaasiat tunngavissiiingitsoq (tassalu apeqqutinut akissutitut paasissutissanik pissarsitinneqarnissamik ataatsimiititaliat taamaallaat piunasaqaateqarsinnaasut).

Inatsisartut suleriaasianni § 14, imm. 3, Naalackersuisunit paasissutissanik pissarsiniarnissamut Inatsisartuni ataatsimiititalianut periarfissiivoq. (Aalajangersakkat immikkut ittut Aningaasaqarnermut Ataatsimiititaliamut Kukkuersiuinermullu Ataatsimiititaliamut atuupput).

Aalajangersagaq ima oqaasertalerneqarsimavoq:

*“Imm. 3. Ataatsimiititaliaq apeqqutip allakkatigut akineqarnissaanik qinnuteqarpat, ataatsimiititaliap qinnuteqaataa Naalackersuisunit naammassineqassaaq. Naalackersuisut taamaallaat paasissutissanik ataatsimiititaliap pissarsisinnaanera killilersinnaavaat, ataatsimiititaliap taakkuninnga paasisaqarnissaminik soqutiginninnera pisortat namminersortulluunniit soqutigisaannut sakkortuneroqisunut tunullinneqartariaqarpat. Taamatut killiliineq tamatigut allakkatigut tunngavilersorneqarsimassaaq.”*

Aalajangersakkap oqaasertalerneqarnerani “apeqqutinut allakkatigut akissuteqarnissaq” kiisalu “paasissutissanik pissarsisinnaaneq” ilaatinneqarput.



**INATSIARTUT**  
SIULITTAASUAT

Taamaallillutik allagaatit assilineri (matumani assersuutigalugu aamma Naalackersuisut isummernissaannut tunngavissiat) aalajangersakkap oqaasertalerneqarnerani erseqqilluinnartumik ilanngunneqarsimangillat.

Illuatungaatigut tunngavilersuutigineqarsinnaavoq, ataatsimiititaliaq (naammattumik sukumiissusilimmik ilusiliilluni) apeqquteqarnermigut allagaatip imarisaanik qulaajaasinnaatillugu allagaatip assilineranik ataatsimiititaliamut tunniussiumannginneq isumaqarpallaanngitsoq.

Aammattaaq ataatsimiititaliat paasissutissanik pissarsiniarsinnaanerannut allagaatinik ilaatitsinnginnissamut akuersaarneqarsinnaasumik tunngavissaqanngilaq (tamanna aalajangersakkap imm. 2-ani killilersuutaasut iluini)

Kiisalu – siunertaq eqqarsaatigalugu – ataatsimiititaliat Inatsisartoqarnikkut Naalackersuisunik nakkutilliisutut atuuffittut suliasaminnik pitsaasumik ingerlatsisinnaanerannut uppersaatitnik pisariaqartinneqartunik pissarsisinnaatitaanerisa pisariaqarnera tunngavilersuutigineqarsinnaavoq.

Siulittaasoqarfiulli nassuerutigisariaqarjaa aalajangersakkamut killiliussat ersernerlummata, tamannalu tunngavigalugu aalajangersakkap erseqqinnerulersinneqarnissaanik sulissuteqarniarluni.


Inatsisartut Naalackersuisunik allaffissornermillu nakkutilliisutut atuuffeqarnerat eqqarsaatigalugu, allagaatit paasitinneqarnissamik qinnuteqarnikkut innuttaasunit tamanit pissarsiarineqarsinnaasut saniatigut Inatsisartuni ataatsimiititalianut pissarsititsisinnaanani inatsisitigut inissisimaneq Siulittaasoqarfimmit attanneqarsinnaanngitsutut nalilerneqarpoq.

Siulittaasoqarfiup paasinninnera malillugu ataatsimiititaliap paasissutissanik, matumani aamma allagaatinik pissarsisinnaatitaaneranik killiliineq taamaallaat tamatumunnga immikkorluinnaq ittunik pissutissaqarluartillugu pisinnaasariaqarpoq.

Siulittaasoqarfiup maluginiagai malillugit ataatsimiititaliat allagaatit assilinerinik qinnuteqartarneri maannamut akuersaarneqartarsimapput – tamanna naak taamatut qinnuteqaatit qaqutigooortorujussuugaluartut.

Suliasat suliarissallugit Inatsisartunit Naalackersuisunillu pisussaaffigineqartut pillugit illuatungeriilluni pitsaasumik ingerlalluartumillu suleqatigiinnerup attanneqarsinnaanera Siulittaasoqarfimmit pingaartinneqartorujussuuvoq, ataatsimiititaliallu allagaatinik pissarsitinneqarsinnaatitaanerat, pissarsisinnaatitaanermut taassumunnga tunngaviusut kiisalu tamatumunnga killiliissutaasinnaasut pillugit Naalackersuisunik oqaloqatigiinnikkusulluni.

Naalackersuisut Siulittaasuat ajornartorsiut matumani pineqartoq pillugu oqaaseqaatissaqarpat, taakku pissarsiarinissaat Siulittaasoqarfimmit qilanaarineqarpoq, soorluttaaq oqaloqatigiissutiginnissinnaaneq aamma Siulittaasoqarfimmit ammaffigineqartoq.



INATSISARTUT  
SIULITTAASUAT

Inussiarnersumik

*Vivian Motzfeldt*

Vivian Motzfeldt  
Inatsisartut Siulittaasuat





Inatsisartut Siulittaasoqarfiannut

/maani

**Inatsisartuni ataatsimiititaliap Naalakkersuisunit paasissutissanik  
piumasaqarneq pillugu allakkiaa**

15-09-2020  
Suliap normua. 2020 - 16147  
All. nr. 14852906

Asasara Inatsisartut Siulittaasuat

Naalakkersuisunit paasissutissanik uppersaatinilluunniit tunineqarnissamut  
piumasaqarsinnaanermut tunngatillugu Inatsisartut periarfissaannik pisinnaatitaaffiinillu  
nalornissuteqartoqarnerata akuerineqarsinnaannginneranut Naalakkersuisut  
Siulittaasua isumaqataavoq.

Postboks 1015  
3900 Nuuk  
Oqarasuaat (+299) 34 50 00  
Fax (+299) 32 50 02  
E-mail: govsec@nanoq.gl  
www.naalakkersuisut.gl

Tassunga atatillugu atorfilittat nassuiaasioqqaarnissaat naleqqunnerpaassasoq  
Naalakkersuisut Siulittaasuat isumaqarpoq. Atorfilittanik Naalakkersuisut  
Siulittaasoqarfiani Inatsisinut immikkoortortaqarfianeersunik aamma inatsisilerituunik  
Inatsisartut Allattoqarfianeersunik inuttaliilluni sukkasuumik suliaqarsinnaasunik  
inuttalerlugit suleqatigiissitaliortoqarnissaa naleqquttuussaaq.

Siullermik malittarisassat sorliit ullumikkut atuunnersut suleqatigiissitamit  
qulaajarneqarsinnaapput tamatumalu kingorna malittarisassat siunissami qanoq  
isikkoqarsinnaanerannut siunnersuuteqarsinnaallutik. Tassunga atatillugu Folketingimi  
Lagtingimilu malittarisassat atuuttut suleqatigiissitamit  
isumassarsiorfigineqarsinnaapput.

Naggataatigut malittarisassat taakku inatsimmut atuuttumut qanoq  
atuutilersinneqarnissaannut tunngatillugu suleqatigiissitaq siunnersuuteqarsinnaassaaq.

Inussiarnersumik inuulluaqqusillunga  
Med venlig hilsen

Kim Kielsen